

魏
书

第八
册

新嘉坡
图书馆
PDS

魏書卷八

世宗紀第八

世宗宣武皇帝諱恪高祖孝文皇帝第二子母曰高夫人初夢爲日所逐避於牀下日化爲龍繞已數匝寤而驚悸旣而有娠太和七年閏四月生帝於平城宮二十一年正月丙申立爲皇太子二十三年夏四月丁巳卽皇帝位於魯陽大赦天下帝居諒闇委政宰輔五月丙子朔高麗國遣使朝貢六月乙卯分遣侍臣巡行郡國問民疾苦考察守令黜陟幽明文武應求道著丘園者皆加褒禮戊辰追尊皇妣曰文昭皇后秋八月戊申遵遺詔高祖三夫人已下悉歸家癸丑宮臣增位一級癸亥南徐州刺史沈陵南叛冬十月辛未鄧至國王象舒彭來朝丙戌車駕謁長陵丁酉有事於太廟十有一月幽州民王惠定聚眾反自稱明法皇帝刺史李肅

捕斬之是歲州鎮十八水民饑分遣使者開倉賑恤高麗國遣使朝獻

景明元年春正月壬寅車駕謁長陵乙巳大赦改年丁未蕭寶卷豫州刺史裴叔業以壽春內屬驃騎大將軍彭城王勰帥車騎十萬赴之二月戊戌復以彭城王勰爲司徒寶卷將胡松李居士率眾萬餘屯宛陳伯之水軍泝淮而上以逼壽春夏四月丙申彭城王勰車騎將軍王肅大破之斬首萬數己亥皇弟桃蕤五月甲寅以北鎮大饑遣兼侍中楊播巡撫賑恤六月丙子司徒彭城王勰進位大司馬車騎將軍王肅加開府儀同三司癸未大陽蠻酋田育丘等率戶內附秋七月寶卷又遣陳伯之寇淮南庚子吐谷渾國遣使朝獻八月乙酉彭城王勰破伯之於肥口乙未高麗國遣使朝貢九月乙丑東豫州刺史田益宗破寶卷將吳子陽鄧元起

於長風齊州民柳世明聚衆反冬十月丁卯朔車駕謁長陵庚寅
齊兗二州討世明平之丁亥改授彭城王勰爲司徒錄尚書事甲
午詔壽春置兵四萬人十有一月己亥荊州刺史桓道進攻寶卷
下笮戍拔之降者二千餘戶丁巳陽平王頤薨是歲十七州大饑
分遣使者開倉賑恤是冬島夷蕭衍起兵東下伐其主蕭寶卷

二年春正月丙申朔車駕謁長陵庚戌帝始親政遵遺詔聽司徒
彭城王勰以王歸第太尉咸陽王禧進位太保司空北海王詳爲
大將軍錄尚書事丁巳引見羣臣於太極前殿告以覽政之意辛
酉高麗國遣使朝獻王戌以太保咸陽王禧領太尉大將軍廣陵
王羽爲司徒詔曰朕幼承寶歷艱憂在疚庶事不親風化未洽今
始覽政務義協惟新思使四方風從率善可分遣大使黜陟幽明
二月庚午宿衛之官進位一級甲戌大赦天下三月乙未朔詔曰

比年以來連有軍旅役務既多百姓彫弊宜時矜量以拯民瘼正調之外諸妨害損民一時蠲罷辛亥詔曰諸州刺史不親民事緩於督察郡縣稽遲旬月之間纔一覽決淹獄久訟動延時序百姓怨嗟方成困弊尙書可明條制申下四方令日親庶事嚴勒守宰不得因循寬怠虧政壬戌詔曰治尙簡靜任責應事州府佐史除板稍多方成損弊無益政道又京師百司賓局殷雜官有閑長者亦同此例苟非稱要悉從蠲省青齊徐兗四州大饑民死者萬餘口是月蕭衍立寶卷弟南康王寶融爲主年號中興東赴建業夏五月壬子廣陵王羽薨壬戌太保咸陽王禧謀反賜死六月丁亥考諸州刺史加以黜陟秋七月乙巳蠕蠕犯塞乙未東豫州刺史田益宗破蕭寶卷將黃天賜於赤亭辛酉大赦天下壬戌車騎將軍儀同三司王肅薨九月丁酉發畿內夫五萬人築京師三百二

十三坊四旬而罷己亥立皇后于氏乙卯免壽春營戶爲揚州民
冬十月丁卯吐谷渾國遣使朝獻辛未蕭寶卷零陵戍主華侯率
戶內屬十有一月丙申以驃騎大將軍穆亮爲司空丁酉大將軍
北海王詳爲太傅領司徒壬寅改築圓丘於伊水之陽乙卯仍有
事焉十有二月高麗國遣使朝貢是月寶卷直後張齊殺其主寶
卷降蕭衍衍克建業

三年春二月戊寅詔曰自比陽旱積時農民廢殖寤言增愧在予
良多申下州郡有骸骨暴露者悉可埋瘞三月魯陽蠻反蕭寶卷
弟建安王寶寅來降夏四月詔撫軍將軍李崇討魯陽反蠻是月
蕭衍又廢其主寶融而僭立自稱曰梁閏月丁巳司空穆亮薨五
月揚州小峴戍主党法宗襲蕭衍大峴戍破之擒其龍驤將軍邾
菩薩送之京師秋七月癸酉于闐國遣使朝獻詔加文官從征顯

達宿衛者二階閑散者一階八月癸卯蕭寶融鎮南大將軍江州
刺史陳伯之遣使請降乙卯以前太傅平陽公不爲三老九月丁
巳車駕行幸鄴丁卯詔使者弔殷比干墓戊寅閱武於鄴南庚辰
武興國世子楊紹先遣使朝獻冬十月庚子帝親射遠及一里五
十步羣臣勒銘於射所甲辰車駕還宮十有一月己卯詔京洛兵
蕪歲踰十紀先皇定鼎舊都惟新魏歷翦掃榛荒翔茲雲構鴻功
茂績規模長遠今廟社乃建宮極斯崇便當以來月中旬蠲吉徒
御仰尋遺意感慶交衷旣禮盛周宣斯于之制事高漢祖壯麗之
儀可依典故備茲考古以稱遐邇人臣之望十有二月戊子詔曰
民本農桑國重蠶籍采盛所憑冕織攸寄比京邑初基耕桑暫缺
遺規往旨宜必祇修今寢殿顯成移御維始春郊無遠拂羽有辰
便可表營千畝開設宮壇秉耒援筐躬勸億兆壬寅饗羣臣于太

極前殿賜布帛有差以初成也甲辰揚州破蕭衍將張囂之斬級二千是歲疏勒屬賓婆羅捺烏菴阿喻陁羅婆不喻陁拔羅弗波女提斯羅嚩舍伏耆奚那太羅槃烏稽悉萬斤朱居槃訶盤陁撥斤厭味朱沱洛南天竺持沙那斯頭諸國並遣使朝貢河州大饑死者二千餘口

四年春正月乙亥車駕藉田於千畝梁州氏楊會反詔行梁州事楊椿左將軍羊祉討之三月己巳皇后先薨於北郊庚辰揚州破蕭衍將於陰山斬其龍驤將軍吳道爽等數千級夏四月癸未朔以蕭寶夤爲鎮東將軍東揚州刺史封丹陽郡開國公齊王庚寅南天竺國獻辟支佛牙戊戌詔曰酷吏爲禍縣古同患孝婦淫刑東海焦壤今不雨十旬意者其有冤獄乎尚書鞠京師見囚務盡聽察之理己亥帝以旱減膳徹懸辛丑澍雨大洽五月甲戌楊椿

羊祉大破反氐斬首數千級六月壬午朔封皇弟悅爲汝南王丙戌發冀定瀛相并濟六州二萬人馬千匹增配壽春秋七月乙卯三老平陽公元丕薨庚午詔還收鹽池利以入公辛未以彭城王勰爲太師八月庚子以吏部尚書元英假鎮南將軍攻蕭衍義陽勿吉國貢楛矢辛丑行幸河南城離宮冬十有一月壬子揚州大破蕭衍軍斬其徐州刺史潘伯隣擒司馬明素己未以武興國世子楊紹先爲其國王癸亥詔尙書左僕射源懷撫勞代都北鎮隨方拯恤乙亥鎮南將軍元英大破蕭衍將吳子陽於白沙擒斬千數十有二月庚寅詔鎮南將軍李崇討東荆反蠻丙申詔曰先朝制立軌式庶事惟允但歲積人移物情乖倚比或擅有增損廢墜不行或守舊遺宜時有舛妨或職分錯亂互相推委其下百司列其疑闕速以奏聞癸卯蕭衍梁州刺史平陽縣開國侯翟遠徐州

刺史永昌縣開國侯陳虎牙降

正始元年春正月庚戌江州刺史曲江公陳伯之破蕭衍將趙祖悅於東關丙辰東荊州刺史楊大眼大破羣蠻樊季安等丙寅大赦改年二月戊子蕭衍將姜慶真襲陷壽春外郭州軍擊走之丁酉揚州統軍劉思祖大破衍眾於邵陽擒其冠軍將軍邵陽縣開國侯張惠紹驍騎將軍祁陽縣開國男趙景悅等十將斬獲數千級三月壬申元英破衍將王僧炳於樊城夏四月辛卯高麗國遣使朝獻五月丁未朔太傅北海王詳以罪廢爲庶人六月以旱徹樂減膳癸巳詔曰朕以匪德政刑多舛陽旱歷旬京甸枯瘁在予之責夙宵疚懷有司可循案舊典祇行六事罔圖冤滯平處決之庶尹廢職重加脩舉鰥寡困窮在所存恤役賦殷煩咸加蠲省賢良謹直以禮進之貪殘佞諛時加屏黜男女怨曠務令媾會稱朕

意焉甲午帝以早親薦享於太廟戊戌詔立周旦夷齊廟於首陽
山庚子以早見公卿已下引咎責躬又錄京師見囚殊死已下皆
減一等鞭杖之坐悉皆原之秋七月癸丑蕭衍角城成主柴慶宗
以城來降李崇大破諸蠻帥樊素安八月丙子元英破蕭衍將馬
仙琕於義陽詔洛陽令有大事聽面敷奏乙酉元英攻義陽拔之
擒送蕭衍冠軍將軍蔡靈恩等十餘將辛卯英又大破衍將仍清
三關丁酉封元英爲中山王戊戌西羌宋萬率戶四千內附九月
丙午詔緣淮南北所在鎮戍皆令及秋播麥春種粟稻隨其土宜
水陸兼用必使地無遺利兵無餘力比及來稔令公私俱濟也又
詔諸州蠲停徭役不得橫有徵發甲子詔中山王英所執蕭衍冠
軍將軍監司州事蔡靈恩等隨才擢敘乙丑蕭衍霍州刺史田道
龍義州刺史張宗之遣使內附蠕蠕犯塞詔左僕射源懷討之冬

十月乙未詔斲羣官白衣募吏十有一月戊午詔曰古之哲王勛業垂統安民立化莫不崇建膠序開訓國胄昭宣三禮崇明四術使道暢羣邦風流萬宇自皇基徙構光宅中區軍國務殷未遑經建靖言思之有慙古烈可敕有司依漢魏舊章營繕國學十有二月丙子以苑牧公田分賜代遷之戶己卯詔羣臣議定律令己亥行幸伊闕閏月癸卯朔蕭衍行梁州事夏侯道遷據漢中來降假尙書邢巒鎮西將軍率眾以赴之乙丑驃騎大將軍高陽王雍爲司空尙書令廣陽王嘉加儀同三司

二年春正月丙子以宕昌國世子梁彌博爲其國王鄧至國遣使朝貢二月梁州氏反絕漢中運路刺史邢巒頻大破之夏四月己未城陽王鸞薨乙丑詔曰任賢明治自昔通規宣風贊務實惟多士而中正所銓但存門第吏部彝倫仍不才舉遂使英德罕昇司

務多滯不精厥選將何考陟八座可審議往代貢士之方擢賢之
體必令才學並申資望兼致丙寅以仇池氏叛詔光祿大夫楊椿
假平西將軍率眾以討之邢巒遣統軍王足西伐頻破蕭衍諸軍
遂入劔閣執衍輔國將軍范始男送京師五月辛巳氏賊闕虎率
眾降六月己丑詔曰先朝勲臣或身罹譴黜子孫沈滯或宦途失
次有替舊流因而弗採何以獎勸言念前績情有親疎宗及庶族
祖曾功績可紀而無朝官有官而才堪優引者隨才銓授甲寅蕭
衍冠軍將軍李暉等置營始平郡東涪水之北王足逆擊敗之斬
衍冠軍將軍張湯輔國將軍馬市寧朔將軍李當姜見祖輔國將
軍馮文豪龍驤將軍何營之等甲子詔尙書李崇太府卿于忠散
騎常侍游肇諫議大夫鄧羨崇忠使持節並兼侍中羨兼黃門俱
爲大使糾斷外州畿內其守令之徒咎失彰露者卽便施決州鎮

重職聽爲表聞乙丑蕭衍冠軍將軍王景胤輔國將軍魯方達等
攻竹亭王足大破之斬其輔國將軍王明達龍驤將軍張芳熾丁
卯揚州刺史薛真度大破蕭衍將王超宗俘斬三千級戊辰蕭衍
將魯方達屯戍新城足又遣統軍盧祖遷等擊敗之斬衍冠軍將
軍楊伯仁寧朔將軍任安定秋七月甲戌詔曰朕纂馭寶歷於今
七載德澤未敷鑒不燭遠人之冤瘼所在猶滋而糾察之獄未暢
于下賢愚靡分皂白均負非所以革民耳目使善惡勵心今分遣
大使省方巡檢隨其愆負與風響相符者卽加糾黜以明雷霆之
威以申旄軒之舉因以觀風辨俗採訪功過褒賞賢者糾罰淫慝
理窮恤弊以稱朕心戊子王足擊破蕭衍軍斬其龍驤將軍喻增
暉寧朔將軍庫保壽輔國將軍魯天惠建武將軍王文標王足逼
涪城壬辰蕭衍巴西太守庾域冠軍將軍統軍主李旼等逆戰足

擊破之俘斬千數八月壬寅詔中山王英南討襄沔庚戌王足遣
統軍紀洪雅盧祖遷等攻破衍軍斬其秦梁二州刺史魯方達等
十五人壬子王足又遣統軍盧祖遷等擊破衍軍斬其都督冠軍
將軍梓潼縣開國子王景胤劉達等二十四將軍甲寅揚州擊衍
將姜慶真於羊石破之是月衍沔東太守田青喜率郡七縣三十
一戶萬九十內附九月己巳揚州刺史元嵩擊破衍湘州刺史楊
公則等斬獲數千冬十有一月戊辰朔武興國王楊紹先叔父集
起謀反詔光祿大夫楊椿討之王足圍涪城益州諸郡咸降者十
二三民送編籍者五萬餘戶旣而足引軍而退十有二月庚申又
詔驃騎大將軍源懷慎令討武興反氏

三年春正月丁卯胡皇子生大赦天下壬申梁秦二州刺史邢巒
連破氐賊克武興蕭衍冀州刺史桓和入寇南青州州軍擊走之

秦州民王智等聚眾二千自號王公尋推秦州主簿呂苟兒爲主
年號建明己卯楊集起兄弟相率降二月丙辰詔曰昔虞戒面從
昌言屢進周任諫輔王闕必箴朕仰續鴻基伏膺寶歷思康庶績
一日萬幾是以側望忠言虛求讜直而良策弗進規畫無聞豈所
謂弼諧元首匡救不逮者乎可詔王公已下其有嘉謀深圖直言
忠諫利國便民矯時厲俗者咸令指事陳奏無或依違戊午詔右
衛將軍元麗等討呂苟兒乙丑平南將軍陳伯之破蕭衍徐州刺
史昌義之於梁城是月衍將蕭昞率眾五萬寇淮陽三月己巳以
戎旅大興詔罷諸作己卯詔荊州刺史趙怡平南將軍奚康生赴
進陽樂良王長命坐殺人賜死國除戊子名皇子曰昌庚寅平南
將軍曲江縣開國公陳伯之自梁城南奔夏四月乙未詔罷鹽池
禁甲辰詔遣使者巡慰北邊酉庶庚戌以中山王英爲征南將軍

都督揚徐二道諸軍事指授邊將蕭衍江州刺史王茂先寇荊州
屯於河南城詔平南將軍楊大眼討之辛酉大破之斬其輔國將
軍王花首虜二千餘進攻河南城茂先逃潰追奔至於漢水拔其
五城將軍宇文福略衍司州俘獲千餘口而還五月乙丑朔詔尙
書丞義陽初附之戶丙寅詔曰掩骼埋胔古之令典順辰脩令朝
之恒式今時澤未降春稼已旱或有孤老餒疾無人贍救因以致
死暴露溝塹者洛陽部尉依法棺埋壬申蕭衍將張惠紹入寇陷
宿豫乙亥衍將蕭容陷梁城辛巳衍將韋叡陷合肥城壬午詔尙
書元遙率眾南討癸未以秦隴未平詔征西將軍于勁節度諸軍
己丑衍將又陷羊石霍丘二城六月辛丑又陷小峴戊乙巳安西
將軍元麗大破秦賊斬賊帥王智五人梟首六千丁未假平南將
軍奚康生破蕭衍將張惠紹斬其徐州刺史宋黑丁巳詔尙書邢